

## 開放文學 – 歷代筆記 – 夷堅乙志 卷第十

張銳醫 成州團練使張銳·字子剛·以醫知名·居鄭州·政和中·蔡魯公之孫婦有娠·及期而病·國醫皆以為陽證傷寒·懼胎之墮·不敢投涼劑·魯公密信邀銳來·銳曰·兒處胞十月·將生矣·何藥之能敗·如常法與藥·且使倍服·半日兒生·病亦失去·明日婦大泄不止·而喉痺不入食·眾醫交指其疵·且曰·二疾如冰炭·又產葷甫爾·雖扁鵲復生·無活理也·銳曰·無庸憂·將使即日愈·取藥數十粒·使吞之·咽喉即平·泄亦止·逮滿月·魯公開宴·自諸子諸孫及女婦甥婿合六十人·請銳為客·公親酌酒為壽·曰·君之術通神·吾不敢知·敢問一藥而治兩疾·何也·銳曰·此於經無所載·特以意處之·向者所用·乃附子理中圓·裹以紫雪耳·方喉閉不通·非至寒藥不為用·既已下嚔·則消釋無餘·其得至腹中者·附子力也·故一服而兩疾愈·公大加歎異·盡斂席上金匕箸遺之·慕容彥逢·為起居舍人時·母夫人病·亦召銳於鄭·至則死矣·時方暑·銳欲入視·慕容不忍·意其欲求錢·乃曰·道路之費·當悉奉償·不煩入也·銳曰·傷寒法·有死一晝夜復生者·何惜一視·不得已延入·銳揭面帛注視·呼伴匠語之曰·若嘗見夏月死者面色赤乎·曰·無·口開乎·曰·無·然則汗不出而蹶耳·不死也·無亟斂·趨出取藥·命以水二升煮其半·灌病者·戒曰·善守之·至夜半大瀉·則活矣·銳舍於外館·夜半時·守病者覺有聲勃勃然·遺矢已滿席·出穢惡物鬥餘·一家盡喜·敲門呼銳·銳應曰·吾今日體困不能起·然亦不必起·明日方可進藥也·天且明·徑命駕歸鄭·慕容詣其室·但留平膏散一貼而已·母服之·數日良愈·蓋銳忿求錢之疑·故不告而去·紹興中人蜀·王拒叔堅問之曰·公之術古所謂十全者幾是歟·曰·未也·謹能七八耳·吾長子病·診■察色·皆為熱極·命煮承氣湯·欲飲之·且飲復疑·至於再三·將遂飲·有如擊吾肘者·姑持杯以待·兒忽發顛悸·覆綿衾至四五·始稍定·汗下如洗·明日而脫然·使吾藥入口·則死矣·安得為造妙·世之庸醫·學方書未知萬一·自以為足·吁可懼哉·王拒叔堅說·

餘杭宗女

唐信道·宣和五年·自會稽如錢塘·赴兩浙漕試·館於普濟寺·寺後空室有旅櫬·欲觀之·僧止之曰·是中乃一婦人·棺半開半闔·時時出與人往來·非數人同人視不可·唐曰·豈有秀才畏鬼者乎·竟獨往·棺上志曰·某王宮幾縣主之柩·蓋距是時已四十年矣·一女子可二十許歲·粉黛鉛華·如新傳者·容色與生人無少異·驚歎而出·還會稽·以語吳械材老·材老曰·是烏足為異哉·吾居餘杭縣寺中·亦有宗女柩寄僧坊者·每夕與僧飲酒歌笑·旁若無人·通衽席之好·遲明就木·僧必送之以往·如是二年·事浸聞其父·父怒·謀舉而焚之·母夢女悲泣告曰·兒不幸死·而冥數當與僧合·自知淫穢·以貽父母羞·然腹已有孕·儻不得生子·則沉淪幽趣·長無脫期·願少緩三月·使畢此緣·然後就焚·無害也·母亦泣而寤·以告夫·夫愈怒·曰·兒已死·乃與庸僧游·又欲為生子·吾不能受此辱·必焚之乃可·是夜母及一家人悉夢女來·如前訴之語而加苦切·申言至數四·明日合詞白其父·父堅忍人也·愈益怒·不俟所擇日至·立呼凶肆之人·輿薪厝火·斧棺而焚之·其腹燔然·少焉折裂·果有嬰兒·已成形矣·信道說·

金馬駒

京師人郭自明太尉·以事太宗藩邸·恩至濮州刺史·賜宅於炭坊巷·嘗夜半聞屋上甲馬奔驟聲·怪之·遣人出視·見一馬大如貓而差高·馳走不止·一卒以荻帚撲得之·取至地·乃黃色小馬·蓋生物也·收養於家·久而馴熟·出入無所畏·郭氏寶惜之·遇食時·婦女剪嫩草如絲縷·手日喂飼·呼為金馬駒·後為人誤擊其足·微有損處·然嘶鳴飲齧自若也·又一夕·有人扣門曰·還太尉馬錢·守者以告·遣視駒已死矣·及啟關·五百千宛然在地·郭氏取錢而瘞其駒·更數歲·發瘞而觀·則成一金馬·旋化為銅·所損足已落·至今猶在·其玄孫繪居鄭州新鄭者·實藏之·繪從弟洸說·

湖口龍

池州每歲發兵三千人·遣一將督戍江西·率以夏五月會於豫章·番休而歸·紹興二十五年·統制官趙■·受代去·行兩日·泊舟順濟祠下·祭罷·攜妓入廟飲酒·以舟中苦熱·命設榻於西廂飲福廳·將翼日早發·廟祝知神不樂·不敢明言·但云·龍王不在廟·出巡江矣·度一二日西歸·大軍若果行·懼或相值遇·不便也·■素膽勇·且被酒·聞祝言·殊不信·叱曰·師行何所畏·如期打鼓發船·行未至湖口縣三十里·遙望若有山橫前·舟人震恐·■以為真山·竦身立觀之·少焉北風大作·白浪湧起如屋·見向所謂山者·乃大赤斑龍·無首無尾·其身長正與江闊等·擁水而南·■猶命射之·百矢俱發·其來愈近·■始懼·急回桌奔入小■避之·矧纜方畢·龍直前而過·寒風肅然·當盛暑·皆有挾纜意·久之乃息·他舟覆者數十艘·沉士卒數十人·巨商同宗行者·亦多溺死·時外舅鎮江西·■具列其事·獨諱廟中之過雲·

吳信叟

卿樞王恭簡公時亨·紹興丁卯歲·為明州節度推官·時吳信叟罷右史鄉居·與賓客罕還往·唯樞及簽判王某·鄞縣宰劉某·三人者·得陪杖屨·然信叟與樞厚甚·一日延之坐·問曰·君家祖塋相對·當有三峰峙立·水流其前·是否·樞驚曰·然·公何以知之·曰·吾非瞽史·但習靜滋久·中心泊然·或可以前知·豈特此也·君異時官職亦可言·從此十年·當為館職·歷著廷·嘗教王府·由柱下史至侍從·然後出為大帥·乃入秉樞極·劉宰固佳士·但壽算垂盡·得終此任幸矣·王簽判亦碌碌一兩政·皆非君比·樞雖素敬之·然亦疑信居半·且謂已第二人及第·一任回·便可謁入館·不應在十年後·既而劉卒於鄞·王簽判亦偃蹇·樞受代改官·才得洪州教授·待久次·丙子歲·乃之官·會信叟人為給事中·薦之·召拜校書郎·閱兩月除佐著作兼二王府教授·而信叟遷吏部侍郎·樞往賀·留與飲·情意戀戀·臨上馬謂曰·見君止此耳·樞訝其言不祥·已而為銓試考官·在貢院·聞信叟坐論事罷知毗陵·即去國·固已不及見·暨出院·遣使持書問訊·至蕭山·則信叟死於縣驛矣·樞果自右史登掖垣·出鎮蜀道·還朝同知密院而薨·考其所言·無毫釐不合·王公說·

王先生

濮州王老志先生·以道術知名·濮有士人·饒口辯·欲以語窮之·往造焉·其居四面環以高墉·但開狗竇出入·士人匍匐就之·方談詞如雲·忽地下旋渦坵·俄已盈尺·中有鱗甲如斗大·先生謂客曰·子亟歸·稍緩必致奇禍·士人遽出·行未五里·雷電雨雹條起·馬蹉跎不行·偶得一土室·入避之·望先生庵廬·百拜乞命·僅得脫·其他事多見於蔡絛國史後補·

義烏古甕

金華喻葆光·字如晦·義烏人也·紹興丙辰正月·命奴江陸·耕所居之南前郭園·耕未竟·土中洞然有聲·牛為之驚·陸意其下有藏窖·輟耕掘地·深二尺·得瓦缶·廣六寸·厚一寸·形模甚古·下覆一甕·甕正圓·可容三斗黍·四耳附口口徑四寸·視之其色蒼然·扣之其音鏗然·發缶窺之·杳然無有也·洗滌滓垢·置之几案間·莫有能別其為何代物者·遇客至·則以盛酒·葆光之子良能·嘗作古甕賦·至今存焉·

夢女屬對

喻叔奇良能紹興丁巳閏十月十三日·夜·宿於居之南齋·夢友人相攜至一處·雲窗霧合·幽閨繡戶·蕭灑可愛·如名妓家·一女子方笄歲·秀色靡曼·衣制嫺雅·床氍茵席·蘭麝之芬鬱然·屏幾供張·皆華好相稱·坐良久·女子顧曰·妾有隔句·欲煩郎君屬對如何·叔奇唯唯·乃言曰·皇天生奚耐之人·見魚便摸·言畢·以紙授客使書·又改人字作才字·叔奇問耐字若何書·曰·從西旁寸者是也·何謂奚耐·曰·人之風流者為奚耐·何謂見魚便摸·曰·猶言見哄便打耳·叔奇方事科舉·以功名為心·意不在色·即答之以他語曰·元氣鍾太阿之劍·逢虎鬚爭·女子熟視微笑·又欲令和詩·未及言而夢覺·雞既鳴矣·二事皆叔奇說·

### 閩清異境

福州閩清縣、近村有大溪、溪北有寺、溪南大山長谷、草樹■延、父老相傳、自古以來、人跡所不到、到則遇奇怪、有三僧從他處來、皆好尋幽選勝、欣然欲往、相與裡糗糧、拏小舟、度彼岸、為三宿計、行未久、滿道蛇虺縱橫、踐之以過、異鳥形容可憎、鳴噪紛紛、觸目生怖、不半日、兩人願還、一僧獨奮曰、出家兒視死為等閒、況怖懼乎、我將獨往、乃並兩人所齎、草行露宿、愈益南去、二之日、蛇鳥漸少、稍有徑路可尋、三之日、亦覺倦苦、遙望山下木杪炊煙起、知有人居、復行前抵其處、得茅屋一間、寂不見人、僧就憩、取亂葉蒸之、俄一人自外荷鋤至、架鋤於門上、趨近附火、視之、人也、不交一談、袖中出芋十枚、炮熟指其半與僧、自食其半、既暮、徑臥土榻上、僧亦同宿、終不相誰何、天將曉、人已去、僧亦從此歸、沿道處處記之、到寺具以所見語兩人、兩人悔前日空反、乃相約重尋之、歷三日、與曩所記無異、及大木下、則茅屋已焚、但斲木皮尺餘、題詩其間曰、偶與雲水合、不與雲水通、雲散水流去、杳然天地空、悵然而歸、後無有能去者、何德獻說、

### 巢先生

紹興八年、無錫縣有道人、曰眉山巢谷、年百十七歲、少時與東坡兄弟往來、狀■雖甚老、然面不顰皺、瞳子碧光炯然、飲酒食肉皆過人、舅氏太學博士沈公體仁、居高村、距縣十餘里、谷每杖策至、輒留連信宿、自言三十歲時逢異人、謂已壽不長、至五十五歲數盡、因授以秘法、使記其歲月日時、俟時至、當即靜室步北斗、而被發臥魁星下、必可免、自是每十五年、輒有大厄、須五如此、若滿百二十歲、則長生不死矣、始時在宿州天慶觀、以正月十六夜當死、如異人教、絕食一日、從道士借空房、托雲行氣、屏處其中、正晝已見鬼物紛紜、如有所追捕、夜且半、來者愈密、周旋室內、至踐髮膚以過、然身殊輕、不能壓、人皆咨嗟叱吒曰、必在此、何以不見、失今夕不取、吾曹罪在不赦、奈何、其夜擾擾幾達曉、寂無所聞、乃敢出、凡四度若此、所見皆同、今年又當爾、未知終可脫否、至十一月二十一日、遍告邑中所善者、乃還寓舍閉戶、過三日、人訝其不出、發戶視之、已死、鼻端一道正白、不知以何日終、豈非造化大限、竟不可逃乎、蘇黃門作巢公傳、已言其卒於嶺南、今此其人豈是乎、惜無有人以此問之者、舅氏說、

### 鬆毬

紹興戊午冬、予兄弟同奉先夫人之喪、居無錫大池塢外家墳庵、庵前後巨松二萬株、次年春、兩鬆各結一毬、鬆高四五丈、毬生其顛、四向翠葉圍繞、宛然天成、庵僧紹明曰、近村邊氏墓鬆、亦曾如此、其狀差小、而其孫安野秀才預薦、今數二而大、豈非沈氏有二子登科乎、是時內兄沈自強、自求、方應進士舉、既而皆不利、而予伯氏、仲氏、乃以壬戌年中博學宏辭、蓋習此科時、正在庵肄業、遂合二毬之瑞、

### 梁元明